

**TABLEAU DE LA
VIE ET DE LA
MORT DE
MONSEIGNEUR
JEAN-BAPTISTE...**

Pierre : de Bausset



1 N 6



VII. 2.

T A B L E A U
D E L A V I E
E T

D E L A M O R T
D E M O N S E I G N E V R
J E A N - B A P T I S T E G A V L T
E V E S Q V E D E M A R S E I L L E .


Avec les pieux desseins que ce bõ Prelat auoit fait pour
l'instruction de tout son Diocese.

par M^{re} P I E R R E D E B A V S S E T , Docteur ès
Droicts & en Sainte Theologie, Preuost de l'Eglise
Cathedrale de Marseille.



A P A R I S ,
Chez J A C Q U E S V I L L E R I , A N T O I N E
& N I C O L A S D E S E R C Y , a u P a r i s .

M. DC. XLIII.
Avec Approbation.



A REVEREND

PERE EN DIEU,

M^{RE} ESTIENNE DV PVGET,

Euesque de Dardanie, nommé à l'E-
uesché de Marseille.

MONSEIGNEUR,

*Si le Ciel nous a rauy un Prelat incompa-
rable dans l'espace de peu de mois, aussi nous
a-il donné en mesme temps un Pasteur d'u-
ne singuliere vertu. Si la mort d'un si grand
Euesque a desolé tout le Diocese, & si les
miracles que Dieu a operé par ses prieres &
intercession ont apporté de l'estonnement
à ij*

à tout le Royaume : La nomination,
MONSEIGNEUR que le Roy a fait
de Vostre Personne, a réparé une perte tant
signalée, par l'opinion que tout le monde a
cognen de vostre vertu. Il est vray que vo-
stre merite vous auoit esteué depuis longues
années à la Charge d'Euesque : Mais que
nous vous possedions pour nostre Prelat,
nous deuons le bien de ceste eslection à ce
sainct Pasteur, auquel le Zele pour l'auan-
cement de son Eglise, sur la fin de ses iours,
auant que donner sa sainte benediction
aux Magistrats de nostre Ville, fit des
prieres à Dieu, à ce qu'il luy donnât un di-
gne & capable successeur en sa Charge. Puis
que vous luy succedez par ses vœux, nous
sommes assurez que vous possederez aussi
ses rares vertus & qualitez, desquel-
les vous verrez l'idée dans ce Liure
que ie vous adresse, & lequel paroissant
soubz la protection de vostre nom, aura plus
d'approbation & plus de lustre ; ce sera un

modelle parfait à tous les Euesques pour
bien conduire leur Diocese, & à Vous
MONSEIGNEUR, une singuliere sa-
tisfaction, d'auoir suiuy un predecesseur qui
donne des lumieres à tous les Prelats du
Royaume, pour auancer la gloire de Dieu,
en la conuersion des ames & en la correction
des Mœurs: C'est la fin que tous les Eues-
ques se proposent, & que nous attendons
de vostre vertu: C'est le desir de celuy qui
sera iusques au tombeau,

MONSEIGNEUR,

Vostre tres-humble & obeïssant
seruiteur.

DE BAYSET, Preuost de l'Eglise
Cathedrale de Marseille.

à tout le Royaume : La nomination,
MONSEIGNEUR que le Roy a fait
de Vostre Personne, a réparé une perte tant
signalée, par l'opinion que tout le monde a
cognu de vostre vertu. Il est vray que vo-
stre merite vous auoit esleué depuis longues
années à la Charge d'Euesque : Mais que
nous vous possédions pour nostre Prelat,
nous deuons le bien de ceste eslection à ce
sainct Pasteur, auquel le Zele pour l'auan-
cement de son Eglise, sur la fin de ses iours,
auant que donner sa saincte benediction
aux Magistrats de nostre Ville, fit des
prieres à Dieu, à ce qu'il luy donnât un di-
gne & capable successeur en sa Charge. Puis
que vous luy succédez par ses vœux, nous
sommes asseurez que vous possederez aussi
ses rares vertus & qualitez, desquel-
les vous verrez l'idée dans ce Liure
que ie vous adresse, & lequel paroissant
soubz la protection de vostre nom, aura plus
d'approbation & plus de lustre ; ce sera un

modelle parfait à tous les Euesques pour
bien conduire leur Diocese, & à Vous
MONSEIGNEUR, une singuliere sa-
tisfaction, d'auoir suiuy un predecesseur qui
donne des lumieres à tous les Prelats du
Royaume, pour auancer la gloire de Dieu,
en la conuersion des ames & en la correction
des Mœurs: C'est la fin que tous les Eues-
ques se proposent, & que nous attendons
de vostre vertu: C'est le desir de celuy qui
sera iusques au tombeau,

MONSEIGNEUR,

Vostre tres-humble & obeïssant
seruiteur.

DE BAYSET, Prenost de l'Eglise
Cathedrale de Marseille.



L' I M P R I M E V R

Au Lecteur.



E sçay que vous desirez) AMI LECTEUR) ce rapport veritable, composé sur les memoires de feu Monseigneur nostre Euesque : Mais les continuelles occupations , où le zele , la charge & la charité de Monsieur le Preuost son Autheur le tiennent engagé , en ont quelque peu retardé la production & l'euidence. Le voicy maintenant tout tel que vous l'aurez pû souhaiter , & où rien ne manque de ce qui est de la verité d'une si sainte vie & d'une si glorieuse mort. Vous avez eu cependant quelque petit liurett qui vous a dit ce qui estoit de la portée de son Autheur , & que ie n'ay pas voulu mettre sur la Presse , n'ayant dessein d'y mettre que des choses plus raisonnables & qui meritent d'estre produites comme celle-cy. La consolation de tous les gens de bien ont exigé ce deuoir de la plume de mondit Sieur le Preuost , qui priuatiuement à tout autre nous pouuoit donner cette satisfaction , puis que l'ayant conuerlé iour & nuict,


& se portant pour heritier de ses memoires
aussi bien que de sa Bague miraculeuse, il a
pû sçauoir les intentions de ce Bien-heureux
Prelat, & les deduire pour seruir d'instruction
& de consolation à tout le monde. I'ay par cy
deuant produit quelques pieux ouurages de
ce Pasteur, pour l'instruction familiere de sa
Bergerie, que ie vous conseille de ne pas ne-
gliger, puis que le rapport des Directeurs des
consciences nous les rendent aussi fructueu-
ses & aussi miraculeuses que chose qui iamais
aye esté faite pour ce sujet. Iouyſſez donc de
ce pieux & veritable rapport, où comme en
vn Tableau mystique, vous pourrez voir l'A-
me & le Corps, les fonctions & les actions
d'un Euesque dont nous esprouuons la sain-
cteté par les Miracles. Adieu.

Approbation des Docteurs.

NOus soubsignez Docteurs en la sacrée Faculté de Theologie de l'Vniuersité de Paris, Certiffions auoir leu vn petit liure intitulé, *Tableau de la Vie & de la Mort de Monseigneur Iean Baptiste Gault Euesque de Marseille*, composé par Messire Pierre de Bauffet, Docteur en Theologie, Preuost de l'Eglise Cathedrale de Marseille. Dans lequel nous n'auons rien trouué qui ne soit conforme à la doctrine de l'Eglise Catholique, Apostolique & Rom. & aux bonnes mœurs. En tesmoignage dequoy nous auons signé la presente ce 7. Iuillet 1643.

C. P A T V Curé de S. Martial.

TABLEAV



TABLEAV

DE LA VIE

ET DE LA MORT

DE MONSEIGNEVR

JEAN-BAPTISTE GAVLT

Euesque de Marseille.



LE bruit des merueilles que
Nostre Seigneur a operé ces
iours passez en la mort de
Monseigneur JEAN-BAPTISTE
GAVLT Euesque de Marseil-
le, ayant éclairé par toute cette Prouince,
a obligé quantité de gens de la plus haute
Condition à se transporter dans cette Vil-
le, pour s'asseurer de la verité, & pour ado-
rer en apres la prouidence de Dieu, qui a
donné la gloire à vn Homme qu'il n'y a
que trois semaines qu'il estoit avec nous,
& que nous n'auions pas encore l'honneur
de bien cognoistre.

A

Aussi tous ses soins ont esté de mener vne vie cachée aux yeux des hommes, se contentant d'estre regardé de Dieu : Verifiant ce proverbe, *Qui bene latuit bene vixit.* Comme ce poisson des Indes, qui durant sa vie demeure caché dans le plus profond de la mer, & apres sa mort vient au dessus des eaux.

Aussi a ce esté vne voix commune tant du peuple que des Magistrats, & de ses domestiques mesmes, qui l'abordoient tous les iours. Nous auons perdu vn bien que nous n'auons iamais cognu. De sorte que les miracles qu'il fait à toutes heures, nous obligent de faire quelques reflexions sur sa vie passée, & admirer toutes ses actions.

Messire JEAN-BAPTISTE GAVT naquit à Tours en l'année 1564. & le 22. Iuin, de Noble Iacob, & Dame Marguerite Poiteuin. Son grand-pere fust vn grand homme d'honneur, il passa par toutes les Charges de la Ville, & fut honoré mesme de celle de Maire, qui est la premiere; & fist en son temps construire le grand Ieu de Mail qui est l'vne des raretez de la France. Et comme ses amis luy vouloient persuader de ne faire pas vne si grande despenſe, qui monta à dix mille escus, il respondit tou-

jours par esprit prophetique, *Mes enfans en auront plus que moy.* Il ne se trompa point, puis que ses deux petits fils sont morts Euesques de Marseille.

Ayant atteint l'aage de dix ans, son Pere l'enuoya estudier au College de Lyon, là où vn Pere Iesuite qui a eu l'honneur d'estre son Condisciple, m'a dit l'auoir toujours recognu grandement porté à l'estude, passant bien souuent la nuict sur les liures, s'adonnant à la vertu, & distribuant aux pauures l'argent qui luy estoit enuoyé par ses parens pour ses recreations. Faisant à Lyon ses Humanitez, son frere Eustache venant d'Italie, où il auoit esté enuoyé par ses parens, s'arresta là avec son frere, & prit pour lors dessein d'estudier; quoy qu'il fust desia âgé & n'eust aucun commencement, ayant plus de vingt deux ans, n'estant pour aucun autre dessein que pour auoir plus de moyen d'entrer dans quelque Compagnie Religieuse, & y pouoir seruir Dieu dans les fonctions Ecclesiastiques: Ce qu'ayant communiqué à son frere JEAN-BAPTISTE, qui ruminait aussi le mesme dessein, Il l'encouragea d'entreprendre genereusement les estudes, & quiluy seruiroit luy mesme de Maistre; ce qu'il fit avec tant

4 *Tableau de la Vie & Mort*

de soyn & d'affiduité, qu'Eustache se rendit capable d'as vn an d'estre admis l'année suivante en Rhetorique à la Fleche, où ils furent tous deux, là firent leur cours de Philosophie: Et l'ayant acheué, il se resolut d'estudier en Theologie, & se consacrer au seruice de Dieu: Et pour le faire avec plus de perfection & de cognoissance, il voulut aller estudier dans Rome, qui est la Ville capitale du monde, ou Iesus-Christ par son Vicaire visible en terre, despart abondamment ses graces. Il passa par cette Prouince, & luy mesme m'a raconté qu'il fut en cette Ville, où il admira son affiette, son Port, & le grand peuple: & n'ayant pas trouué commodité preste pour partir, tira son chemin à Canes, où d'abord qu'il fust arriué trouua vne Barque qui estoit preste à faire voile: mais le vent estant trop frais, il n'eut pas courage de s'embarquer: Le Patron fist voile & deux heures apres fut rencontré par vn Courfaire Turc, qui le prit & le mena dans Alger. Dieu qui destinoit ce Grand Homme pour tirer les ames de la seruitude du Diable, ne voulut pas permettre qu'il fust esclaué des hommes.

Estant arriué heureusement à Rome, il s'adonna à toute sorte d'exercice vertueux;

car outre l'occupation des lettres , il visitoit souuent les Hospitaux , & la sepulture des Bien-heureux Apostres : Son cours de Theologie estant acheué il retourna en France. Arriué qu'il fut à Paris , ayant consulté Nostre Seigneur avec son Frere aisné Eustache , ils resolurent tous deux ensemblement de se presenter à feu Monseigneur le Cardinal de Berulle , pour estre receus en la Congregation de l'Oratoire. Apres qu'ils eurent bien pris cet esprit , ils furent pourueus aux Ordres sacrez : & ne furent pas plûtoſt Prestres que leur vertu esclata si fort , que toute la Congregation jetta les yeux sur ces deux Grands Hommes , pour gouverner non seulement les principales Maisons establies en France , mais encore pour en criger de nouvelles. Pendant le temps qu'il fut Superieur en la Maison du Mans , ce grand Esprit infatigable s'occupoit encores à lire la Theologie publiquement ; apres il prescha des Carêmes aux plus fameuses Chaïses , comme à Rennes , à Nantes , à Bordeaux , & deux fois en la Ville de sa naissance. Enfin ayant donné des tesmoignages suffisans de leur sage conduite , furent enuoyez tous deux par Monseigneur le Cardinal Berulle en Espagne , pour

y fonder à Madrid la premiere Maison de l'Oratoire.

Cette commission estant finie suiuant leurs intentions, ils retournerent en France : arriuez qu'ils furent à Bordeaux, Monseigneur l'Archeuesque goustâ ces deux Esprits, & se voyant obligé par le commandement du Roy & pour le bien de l'Estat, à quitter le repos pour prendre la fatigue & le soin des armes : voulut à tout le moins pouruoir son Diocese de personnes integres, de capacité, & de conduite, afin que rien ne deperist par son absence. Il donna la charge au Reuerend Pere Eustache de tout son Diocese, & au Reuerend Pere I E A N - B A P T I S T E, la Cure de Sainte Eulalie, & le soin d'instruire les Ecclesiastiques de son Diocese, où il fit vn si grand profit, que depuis estant Euesque il m'a tesmoigné que tout son desir estoit de faire vne assemblée vne fois la semaine, qui ne fust à autre fin que pour l'instruction des Prestres. Et ayant appris par lettres que les R R. Peres Iesuites estoient dans ce loüable dessein, il m'escriuit le premier Feurier 1641. & me pria de faire entendre ausdits Peres de ne vouloir pas commander cet ouurage qu'il n'y fust present. Voicy les termes dont il se seruit en m'escriuant.

Vous ne m'avez rien encore mandé de ce que vous avez fait touchant ce petit dessein des Peres Iesuites pour vne Congregation des Ecclesiastiques : ie veux croire que vous avez agy selon que ie vous auois escrit, & que vous avez fait en sorte qu'ils me laissent cette portion de travail, que ie cheris au dernier point. Je ne doute point qui ne s'en acquitassent dignement, mais non pas peut estre dans les desseins que Dieu m'a donné, & que i'ay conceu il y a long temps. Et ce peu qu'ils feroient attendant mon arriuée pourroit estre empeschement à ce que ie pretends de faire.

Pendant que ces deux grands Hommes traualloient à Bordeaux pour le seruice de Dieu, & pour Monseigneur Henry de Sourdis Archeuesque dudit lieu. Messire François de Lomenie Euesque de Marseille vint à mourir à Limoges lieu de sa naissance: la nouvelle estant arriuée à la Cour, mondit Seigneur employa toutes ses forces pour auoir l'Euesché pour le Reuerend Pere Eustache, homme de grande vertu & de pareille doctrine : aymé de tous les Grands de la Cour, & sur tout de feu Monseigneur le Cardinal Duc. Le breuet luy fut expedié au mois de Mars en l'année mil six cens trente neuf, & dez-aussi tost il enuoya à Rome pour auoir expedition de ses Bulles, & pour estre prest à

venir à Marseille : il se retira à Tours pour mettre ordre à ses affaires domestiques, & prendre congé de ses parens : Mais le malheur du temps voulut que les expéditions ne se faisoient point dans Rome, ce qui conuia Monseigneur de Bordeaux pour profiter de ce retardement de l'appeller en son Diocèse, pour y prescher & continuer son premier exercice, attendant que Nostre Seigneur eût mis fin à toutes les difficultez. Voicy les termes de la lettre qu'il m'escruiuit sur ce sujet le 17. Iuillet 1639.

J'ay receu lettres il y a quatre iours de Monseigneur l'Archeuesque de Bordeaux, par lesquelles, enuiant le repos que j'auois icy parmy mes amis, il m'ordonne d'aller en son nom faire visite en son Diocèse, & suppleer au micux que ie pourray à son absence : attendant que mes Bulles viennent de Rome, pour aller trauailler à Marseille, à quoy ie me dispose. I'eusse bien peu trouuer quelques raisonnables excuses enuers ledit Seigneur, & ie sçay qu'il les auroit admises : Mais ie ne sçay si ie me fusse bien iustificié enuers celuy qui luy a donné cette pensée : & la crainte de defaillir aux desseins de Dieu m'a rendu fort obeissant à celuy des hommes.

Dans cet employ il luy prit vne fluxion sur les polmons, avec vne fièvre lente qui l'emporta le treize de Mars en l'année 1640. Ce fut

fut pour lors que nostre JEAN-BAPTISTE commença à ressentir des grandes afflictions se voyant séparé d'un frere qu'il auoit si tendrement aymé, c'estoit vn Castor & vn Pollux, qui n'auoient iamais peu viure separez l'un de l'autre, en tous les emplois, l'un estoit compagnon de l'autre. Il est bien vray que comme la Cure de Sainte Eulalie l'appelloit quelquefois pour y trauailler en personne, & qu'il falloit par consequent faire quelque petite separation : Eustache ne la pouuant souffrir, luy disoit *Mon frere, n'y allez pas, vostre Vicaire supplera à cela.* Il respondit, *Mon frere, l'on ne va en Paradis par Procureur.*

Le mal presse plus fort Eustache : il se sent affoiblir tous les iours. C'est pour lors que JEAN BAPTISTE s'attache avec plus de fermeté à son frere, qu'il ne quita plus qu'apres sa mort : Il luy dit durant vn mois la Messe tous les iours en sa chambre, il le confessoit, il le communioit, le consoloit, & enfin l'exhorta à la mort. Quel combat ne ressentoit pour lors JEAN-BAPTISTE, quelle constance n'eut il contre les atakes de l'amour, pour faire subsister son esprit en l'union de nostre Seigneur, consoler son frere au temps que les plus courageux ont besoin d'estre consolez : Il l'embrasse, & entre les bras de JEAN-BAPTISTE

estendu rendit l'esprit à son Maistre , le treize Mars en la ville de Bazas.

JEAN BAPTISTE ayant fermé la bouche & les yeux à son frere , il ne le pleura point, pour autant qu'ils s'estoient obligez par serment l'un l'autre que celuy qui suruiroit ne pleurerait point l'autre : c'est pourquoy , d'abord qu'Eustache fust mort, il se jetta sur vn matelas, estant assis contemploit son frere , & puis leuant les yeux au Ciel disoit, *Mon Dieu soyez beny à iamais , & que ma consolation soit en vostre volonté.* Monseigneur de Bazas s'approcha de luy pour le consoler, *Non* (luy dit) *Monseigneur , ie suis tout consolé , ie sçay que Dieu est le Maistre , & il l'a voulu ainsi : Je croy que mon frere est Bien-heureux , il a bien vescu , il est bien mort.*

Il est vray, & ses seruiteurs me l'ont aussi assuré , qu'estant quelque iour à table avec Monseigneur de Bazas, vne mienne lettre luy fut rendue, par laquelle ie luy tesmoignoïs les regrets que toute la Ville auoit eu de la mort de Monseigneur son frere, & que nous esperions des grands biens de sa conduite : il ne peut contenir les larmes ; & pour ne le faire paroistre, de peur de violer le serment, il mit la seruiete deuant le visage, & laissa passer doucement cet effet de la dou-

leur & de la tendresse de son amour. Et pour
tesmoigner au public sa constance, deux iours
apres l'enterrement de son frere, il prescha
le iour de Saint Ioseph. aux Religieuses Vir-
selines de Bazas, où il raut tout son auditoi-
re.

Monseigneur l'Archeuesque de Bordeaux
estoit à Paris lors que la nouuelle vint de la
mort du Pere Eustache, il n'oublia rien pour
conseruer ce Benefice à JEAN BAPTISTE, il va
voir le Roy, & Monseigneur le Cardinal: Il
n'emporte pas d'abord ce qu'il desiroit, y ayant
beaucoup d'autres pretendans. En fin le Roy
& Son Eminence, qui n'auoient autre but
que de donner de Saints Prelats à la France,
furent flechis par les persuasions & tesmoi-
gnages que leur donna mondit Seigneur de
Bordeaux de sa probité & vie exemplaire, &
qu'inailliblement il seroit vn bon Euesque.
La parole luy est donnée, & le breuet luy fut
expedié en suite, à la fin du mois d'Auril en
l'année mil six cens quarante: Le Roy luy fit
l'honneur de luy escrire & Monseigneur le
Cardinal Duc aussi. Il receut ses lettres à Ba-
zas, & en mesme temps il se retira dans sa
chambre, & s'y mit à deux genoux, les mains
iointes, leuant les yeux au Ciel, & pria avec
grand ardeur Nostre Seigneur de luy despar-

tir son S. Esprit pour la conduite des ames, & mettre en execution les bons desseins de feu son frere, & ceux aussi qui luy auoit pleu inspirer. Ce fut le motif qui le porta à accepter ce pesant fardeau.

Il s'en vint à Paris pour remercier le Roy & Son Eminence, & ne les ayant pas trouuez, il passa à Soissons où il eut l'honneur de les saluer : Son Eminence l'accueillit fort gracieusement, & dit à son Capitaine des Gardes, laisser passer Monsieur Gault toutes les fois qu'il desirera parler à moy, & commanda à Monsieur de Noyers de luy faire prompte expedition, ce qui fut executé. Il s'en retourna pour prendre congé de Son Eminence, d'abord les portes luy furent ouuertes, & il le qualifia du nom d'Euesque de Marseille, luy recommandant de se retirer le plus promptement qu'il pourroit en son Euesché : que ceste Ville auoit vn extreme besoin de son Pasteur, & qu'il se promettoit qu'il y viuroit en bon Euesque.

Il se retire donc à Paris, enuoye son breuet à Rome, & pendant cette attente le Reuerend Pere Contrand General de l'Oratoire vint à mourir, il l'assista iusques au dernier soupir de sa vie : Ce bon Pere tesmoigna qu'il n'auoit autre regret en partant de ce

monde que de n'auoir peu satisfaire au desir qu'il auoit eu pendant sa vie de faire vne Mission à Soissons lieu de sa naissance. Messire JEAN-BAPTISTE luy promit de satisfaire pour luy, ce qu'il fit avec huit Peres de l'Oratoire : & despendit en cette occasion près de douze cens escus, parce qu'il donna largement aux necessitez qui luy vindrent en rencontre. Voicy comme il m'escriuit du vingt fixiesme Mars 1641.

I'ay receu vostre lettre hors de Paris, & dans le Diocese de Soissons, où i'y suis depuis trois semaines : le retardement de la Cour de Rome me donne subiet de faire ce petit voyage, non tant pour me promener, comme pour me ioindre à demy douzaine de nos Peres qui y sont venus pour faire Mission. I'ay creu que ie ne pouuois mieux employer le temps que ce retardement me donne qu'en seruant Dieu si vrilement. Je ne puis vous exprimer la consolation que nous trouuons dans cet exercice, voyant la fruct de nos trauaux tout present & par où nous passons comme vn renouvellement du Christianisme ; Cela me fait prendre de plus en plus dessein d'en faire faire dans le Diocese de Marseille.

Il trauilla en cette Mission durant deux mois, confessant, preschant tantost dans les villes, tantost à la campagne, catechisant les pauures payfans : Aussi comme il estoit d'v-

ne complexion assez foible, & qui d'ailleurs estoit menacé d'une fluxion sur la poitrine, l'excez du travail l'affoiblit, & une fièvre lente luy survint, qu'il contraignit de prendre la route de Paris. Les Medecins l'ayant veu luy conseillerent de reprendre son air natal & de s'en aller à Tours. Il m'escriuit avant que de partir, une fort belle lettre, en voicy les termes: elle est du 30 May 1641.

Je vous escrit ce mot sur le poinct de m'acheminer en Touraine, c'est l'avis de tous les Medecins, pour remedier à un mal de poitrine qui m'est survenu en suite de ma Mission, non que ie sois fascé d'avoir esté à cet employ: l'estimeray tousiours à benediction les playes qui m'arriveront au service de mon Maistre, & la mort me seroit glorieuse si ie la gaignois en taschant à luy gaigner des ames: Je ne refuse pas neantmoins de chercher les remedes, que dans le soulagement qu'ils m'apporteront, me rendront plus disposé à servir le Diocese de Marseille, auquel Dieu m'appelle. C'est la seule veue que j'ay dans les remedes; car sans cela i'estimerois la mort plus avantageuse que la vie.

Il arrive à Tours, & la fluxion ne se dissipe point, la fièvre continuë se change en fièvre tierce, elle le detient tout l'Esté iusques à l'Autonne: Enfin il se trouue soulagé par la grace de Dieu, & tout à fait delivré. Il n'eust

pas plustost recouuré les forces du corps, qu'il pensa à se disposer dignement à recevoir & demander les graces pour bien regir son Diocese : Et pour cet effet, il se retire à Saumur où il y a vne deuotion tres-grande à la Sainte Vierge, & cette Chapelle regie par les Prestres de l'Oratoire. Il s'y en va dis-je, pour y faire sa retraite spirituelle, & y passa depuis la mi-Iuillet iusques à Nostre Dame d'Aoust. Voicy comme il m'en escriuit.

Cependant ie suis venu passer quelques iours à vn lieu que nous auons en nos quartiers de grande deuotion à Nostre Dame, à dessein de me recueillir vn peu, & demander à Nostre Seigneur, par l'intercession de sa sainte Mere, la grace pour bien regir les ames dont il me donne la charge. Ie me persuade qu'à la feste de sainte Magdelaine vous aurez prié Dieu. I'ay eu soin dans mes Prieres, de luy recommander le Diocese de Marseille. Il me semble que ceste Sainte Amante de Iesus-Christ a quelque obligation à veiller particulièrement sur ce Diocese : Ie la supplie de tout mon cœur, qu'elle vous impetre l'amour de Iesus-Christ, & qu'elle vous obtienne la grace de travailler en sorte que nous puissions contribuer & eschauffer les autres dans ce saint amour. De Saumur le vingt-huitiesme Iuillet 1641

Il demeura encore vne année de recevoir

B iiij

ses bulles, qui ne furent expédiées que le quatorzième de Juillet iour de saint Bonaventure en l'année 1642. Durant tout ce temps il l'employa à se dignement preparer pour estre vray imitateur. & successeur de Saint Lazare. Comme les lettres de Paris & de Rome qu'il receuoit par tous les Ordinaires luy marquoient qu'il n'y auoit encores d'apparence que le Pape pourueût aux Eueschez de France si tost : au lieu de s'inquietter, il disoit au contraire souuent ces paroles. *Benit soyex mon Dieu, ie me reioins & vous remercie du temps & du loisir que vous me donnez pour songer à ce que ie dois faire.* Et mesme la nuit s'esueillant, la premiere chose qui luy venoit en memoire estoit l'expedition de ses bulles : d'abord cette pensèe luy tiroit les larmes des yeux, & disoit ces paroles. *O mon Dieu ne permettez pas que cette affaire se face à Rome, si vous voyez que ie ne m'acquitte comme il faut de la charge à laquelle vous m'appellez : Et si au contraire, vous voyez que ie puisse faire quelque profit pour vostre gloire & le salut des ames, faites moy despescher, & donnez moy les forces pour mettre en execution les bons desseins qu vous m'inspirez.*

Il passa le reste de l'année au Mans avec Monseigneur l'Euesque. Il y receut de grandes honneurs, & dans ce sejour les nouuelles luy

luy arriuent que ses bulles estoient expediees & arriuees à Paris: Cette nouuelle le deuoit extremement rejoyr, au contraire, il en fut plustost triste: Et s'estant retiré dans sa chambre, & ayant pleuré amercement, il dit à ses domestiques. *Dieu soit loué, me voila beaucoup chargé, mais courage, il faut trauailler puïssamment.* Il commanda à tout son train de se preparer à partir pour Paris, où il vouloit aller se faire sacrer; quelques vns luy dirent qu'il falloit aller premierement à Tours, & y voir & dire adieu à ses parens & amis, *Non* (respondit-il) *ie ne le puis, car mon frere m'a dit deux choses en mourant, que ie serois Euesque apres luy, mais que ie ne tarderois pas à le suiure.*

De maniere que voyant le cours de sa vie estre fort court, il n'en voulut pas perdre vn moment: il s'en alla à Paris, & d'abord qu'il fut arriué m'escriuit & ordonna que ie fisse dire des prieres particulieres à toutes les Eglises de son Diocese, afin que le Saint Esprit l'assistast le iour de son sacre, & en escriuit luy mesme à la Mere des Carmelites, afin que ces bonnes filles l'aydassent de leurs prieres, particulierement en cette rencontre. Il s'estoit preparé pour estre sacré le iour de saint Michel, ayant vne particuliere deuotion à ce grand Protecteur de la France: mais

vn des Prelats estant incommodé, la ceremonie fut differée iusques au Dimanche suiuant 5. du mois d'Octobre dans l'Eglise Saint Magloire, au faux bourg Saint Iacques. Ce fut dans cette occasion qu'il parut avec vne modestie incroyable, ayant son esprit tout en Dieu & nullement attaché aux grandeurs de la Charge. Aussi tout le long de la ceremonie il ne fit que pleurer. Monseigneur l'Archeuesque de Tours qui auoit fait l'information *de vita & moribus*, fut celuy qui le sacra, assisté de Messieurs les Euesques de Vannes & de Bologne. Aprés son sacre il brusloit de desir de venir à Marseille, & tous les iours qu'il demeura apres dans Paris ce luy estoient autant d'années : l'enuie de satisfaire à son deuoir à l'endroit de son Eminence, l'obligea de ne partir pas sans son congé, & parce qu'elle deuoit arriuer de iour à autre de Lyon, il sejourna iusques au douziesme Noembre, auquel iour il dit son dernier adieu à la Cour, pour venir viure & mourir dans Marseille.

Il demeura vingt iours de Paris à Lyon, ne faisant que cinq à six lieues au plus, pour autant que tous les iours il celebroit sa Messe, particulièrement dans les Conuents des Religieuses qui auoit en sa rencontre : apres

quoy il les remercioit avec quelques discours meslez de deuotion : Bref, il ne partoit iamais du lieu où il auoit couché que sur les dix heures du matin.

Arriué qu'il fut à Lyon, il se trouua trois iours indisposé à cause du trauail du chemin, il enuoya la plus grande partie de ses meubles avec quelques domestiques par eau, continuant son chemin par terre : il eut à vne lieüe proche de Valence en sa rencontre Monseigneur le Comte d'Alez, Gouverneur pour le Roy en ce païs, qui mit pied à terre, l'embrassa & luy tesmoigna ses particulieres affections, luy recommanda l'establissement des Filles de la Misericorde, quoy qu'elles n'eussent pas besoin d'un si grand appuy, luy mesme y estant extrememēt porté ainsi qu'il m'auoit escrit vn peu auparauant que de partir de Paris.

Il arriua à l'Isle de Venisse le troisieme du mois de Decembre, pour y voir Monseigneur l'Archeuesque de Bordeaux. Je ne vous scaurois assez exprimer les tesmoignages d'affection que mondit Seigneur rendit à nostre Saint Prelat : Il luy donna vn quartier grandement bien meublé, sa chambre richement tapissée, & vn liēt de toile d'or : il fit vne grande violence sur son esprit pour y cou-

cher dedans : mais en cette rencontre il estima qu'il valloit mieux estre obeyssant que humble. Nous fîmes les premiers à le saluer de la part du Chapitre , luy faire les offres de nos tres-humbles services ; il nous receut avec vn visage ferein , & parla avec nous plus de deux heures en commun, des discours fort gracieux , & puis nous nous tirâmes en particulier , où i'eux l'honneur de le tenir encores vne heure , me parlant continuellement des affaires qui pouuoient regarder l'honneur de Dieu , le salut des ames, & la reformation des abus de son Diocese.

Je le priay de vouloir venir le plustost à Marseille : il me dit, *I'y voudrois estre , mais c'est le moins que ie dois à Monseigneur de Bordeaux que de demeurer icy tant qu'il luy plaira , puis qu'il m'a fait ce que ie suis : toutesfois vous m'obligerez bien fort de le prier à vous accorder vostre demande , à quoy ie satisfis : mais mondit Seigneur ne voulut iamais demordre. Et quoy qu'il n'eut pris que huit iours de terme pour son sejour , les eaux de la Durance deborderent si fort qu'il y demeura iusques au quatriesme du mois de Ianuier : Il arriua à Aix la veille des Roys ; & quoy que Monseigneur l'Archeuesque luy eût offert son logis avec presse , il prit chambre dans l'Oratoire , &*

mesme voulut viure le iour des Roys & servir en la Communauté, ce qu'il practiquoit ordinairement les iours des grandes festes depuis sa nomination à l'Euesché. Il fut visité par Monsieur le Comte de Carces Lieutenant pour le Roy en cette Prouince, & de la plupart de Messieurs, tant du Parlement que des Compres: Monsieur l'Intendant luy tesmoigna la recommandation que luy en auoit fait feu Monseigneur le Cardinal Duc; & quoy qu'il eût beaucoup d'affaires & de ciuilitéz à rendre dans ceste Ville, impatient du desir de se voir dans son Diocese, il en partit le septiesme Ianuier; arriué qu'il fut au logis du Pin, ie luy dis, maintenant Monseigneur, vous estes dans vostre Diocese. Il eleua son esprit à Dieu; & *bien saluons saint Lazare*: Nous fecitâmes l'Antienne, & apres il demeura quelque temps en silence, iusques à ce qu'il fut arriué à la descente de la Vigne blanche, là nous mîmes pied à terre: Il admira premierement le terroir & le grand nombre des Bastides, apres ie luy dis, Monseigneur, vous voyez Marseille. *Helas* (me respondit il) *ie la vois, & ce doit estre le theatre de ma gloire ou de ma damnation: Dieu par sa misericorde me face la grace que ie puisse trauailler à son honneur & au salut des ames.*

Nous montons dans son carrosse, & d'abord arriue vn Gentilhomme qui nous vint recognoistre, demanda au cocher si c'estoit Monseigneur de Marseille, & ayant appris que c'estoit luy, il rebourça chemin. Nous ne sceusmes le cognoistre, ny sçauoir de la part de qui il pouuoit estre enuoyé, si de Monseigneur le Cardinal de Lyon ou de Messieurs les Consuls. Il auoit resolu en partant de la Ville d'Aix, d'arriuer incognu & de nuict, & mesme de ne prendre autre logis que l'hostellerie, pour tesmoigner plus de respect à Son Eminence, & qui n'estoit venu à Marseille que pour luy, sans y voir personne autre. Il ne le peut neanmois faire, que plusieurs & des plus apparens de la Ville ne le sceussent, portez du desir extreme de voir ce grand Prelat, venant deuant iour au logis pour tesmoigner la ioye qu'ils auoient de son arriuée.

Nous partismes à la pointe du iour, & arriuasmes sur les huit heures du matin à Saint Marsel; il descendit & voulut celebrer la Messe à son arriuée, apres laquelle nous allâmes à l'hostellerie pour prendre vn peu du vin & passer à Aubagne: Cependant comme l'on preparoit quelques œufs frais, c'estoit vn Vendredy, tous ces habitans s'eforçans à qui mieux luy tesmoigneroit son affection, les vns

luy apportoint du vin blanc, les autres du muscat, les vns du poisson, & les autres des figues. Il estoit rauy de voir le zele de ces bonnes gens. Il termina en cette rencontre vne inimitié entre deux personnes des plus apparens du lieu.

Cependant les Consuls d'Aubagne deputent à la rencontre de mondit Seigneur, le trouuent à Saint Marcel, & supplient de ne se haster point, qu'ils desiroient avec loisir le dignement receuoir, ce qu'ils firent : à vn quart de lieüe de là nous trouuasmes lesdits Consuls accompagnez de plus de deux cens hommes qui luy vindrent faire la reuerence, & trois ou quatre cens enfans qui crioient *Vive le Roy & Monseigneur de Marseille.* Il entra dans le Lieu donnant tousiours la benediction, & commanda aux Prestres de chanter Vespres, pendant lesquelles il fut tousiours à genoux : apres il se retira dans son Chasteau, admirant cete belle veüe, tout transporté d'aïse de se voir dans le repos, apres lequel il soupiroit depuis quelques années.

Huict iours apres vint en cette Ville, il arriua le Samedi au soir, & le lendemain voulut prescher, nonobstant les prieres que ie luy fis de ne prescher point, Monseigneur de Bordeaux m'ayant recommands en sa presence

d'empescher qu'il ne preschast, son frere s'estant tué (disoit-il) en preschant, & qu'il vouloit faire le mesme : son zele rendit vaine sa priere, il prescha, aussi fut il malade, & demeura huiet ou dix iours à se remettre, apres lesquels il commença à faire quelques visites des Hospitaux & Monasteres des filles : fut voir Messieurs de Sainct Victor, qui le receurent fort honorablement, & me dit qu'il fut touché dans ceste Eglise, ayant demeuré vn grand quart d'heure à genoux deuant le Maître Autel. Apres il fut visiter le filles Penitentes & du Refuge, pour lesquelles il auoit de grandes tendresses : il aprit d'vn des Messieurs les Recteurs, qu'il y en auoit quelques vnes qui faisoient du bruit & vouloient sortir ; il leur parla avec tant de deuotion qu'elles fondoient en larmes, leur remontrant le bonheur de leur condition. Que si Dieu leur faisoit la grace de le cognoistre, il les faudroit trainer pour les faire sortir, & qu'il donneroit volontiers sa vie pour tirer les autres du malheur dans lequel elles se sont miserablement precipitées : il leur distribua en suite sa charité : mais avec excez, si dans semblables oeures il y en peut auoir. Il me souuint qu'vn iour le R. Pere Pitieua de l'Oratoire qui sert charitablement cette Maison, luy escriuit de
luy

luy despartir ses charitez pour deux filles qui y vouloient entrer, & ne pouuoient, pour n'auoir pas dequoy faire leurs habits : il respondit au Pere Pitieu avec vn grand amour, & donna charge au R. Pere Cauuin Econome de donner suffisamment pour en habiller six.

Il n'y a pas long temps qu'un Gentil homme de cette Ville ayant charge du Refuge, luy vint dire qu'il n'auoit plus dequoy pour soustenir ceste Maison, il luy donna deux cens liures avec ces paroles, *Ne perdez pas courage vous en aurez encore autant quand cela sera finy.* Messieurs les Recteurs de la Charité font leur queste, le soir auparauant nous nous entretenions de cela, & me demanda qui estoit dans la Ville qui donnoit le plus à la Charité, ie luy dis vn personnage qui donnoit quarante escus : *He bien (respondit il) ie suis obligé à plus, i'en donneray cinquante, ce qu'il fit le lendemain.*

Comme le peuple aprit que ce Saint Homme estoit grandement liberal, chacun auoit recours à luy en ses necessitez. Enuiron les festes de Pasques dernieres, le R. Pere Pascal Recolet arriua en cette Ville avec quelque argent qu'il deuoit employer pour le rachapt de quelques Esclaues detenus en Tripoly, & d'autant que sa commission ne por-

toit pas de donner plus de cent liures pour chacun Esclaue, & que son accord avec le Bascha estoit de les donner tous pour cent cinquante piaſtres : Beaucoup de pauvres maisons qui y auoient de prisonniers ne pouuant faire ladite somme recouroient aux charitez de nostre bon Pere pour estre secourus. Il me fit appeller pour lors & me parla de la sorte, *Monsieur, voicy beaucoup de monde pour le rachat des esclaves, qui de son mary, qui de son enfant : ie suis dans vne grande tristesse de n'auoir pas dequoy les secourir, ie ferois tres-volontiers comme Saint Paulin, donnerois ma personne : mais ie ne puis rien faire pour eux, pour autant que le peu de commodité que i'ay, ie le veux employer plustost à deliurer les ames de la seruitude du peché, que le corps de la Captiuité des Turcs.*

Ce n'est pas pourtant qu'il n'eust vne tres-grande affection pour deliurer les Esclaues de Barbarie, m'ayant prié souuent par lettres de luy enuoyer quelques memoires sur ce sujet, ayant mesme souuent sollicité Monseigneur l'Archeuesque de Bordeaux lors qu'il commandoit les Armées navales, de faire vne course pour deliurer les pauvres captifs d'Alger & de Thunis. Cependant comme les affaires de la guerre ne permettoient pas à la France de faire cognoistre à ces barbares le

tort qu'ils ont d'auoir si souuent violé leur foy, & rompu contre le droict des gens la Foy qu'ils auoient iurée en leurs traitez. Il meditoit en son esprit d'enuoyer en ces quartiers vne Mission pour consoler ces pauures affliges, & les fortifier, afin d'empescher que les tourmens ou les recompenses que ces infidelles leur promettent, ne les portassent à renier leur foy. C'est pourquoy il disoit tousiours, que la Ville de Marseille auoit plus de besoin qu'aucune autre du Sacrement de Confirmation, & pour cet effet il auoit dressé & fait imprimer vn petit aduertissement, qu'il faisoit distribuer en son Diocese, afin que chacun se preparast à receuoir dignement ce Sacrement, qui nous donne des armes & nous sert de bouclier pour resister aux attaques que les ennemis de nostre foy nous peuuent liurer.

La premiere Ordonnance qu'il fit en son Diocese, fut le retranchement des dispences des publications des Bans, dequoy il m'en parla à l'Isle de Venisse, & en presence de Monseigneur de Bordeaux, qui le portoit à faire publier les trois bans : Luy au contraire, avec sa modestie ordinaire luy dit, *Monseigneur, Marseille est vne Ville qui se gouuerne par coustume, il ne faut pas tout retrancher à la fois, il*

faut aller doucement & faire vn pas apres l'autre.

Et afin que toutes les Ordonnances procedassent avec vn bon conseil, il establit vne assemblée de quelques Docteurs, qui se tenoit tous les Mercredis de la sepmaine, ausquels il faisoit proposer par son Promoteur d'office, les affaires qui deuoient estre resoluës. Entre autres choses, qu'il proposa vn iour avec vn desir incroyable d'y apporter reglement, c'est quel remede on trouueroit à ce que les femmes n'allassent pas tant descouuertess; toutes les opinions furent differentes aux remedes & aux moyens de pouuoir arriuer à vne si honneste & honorable fin. Alors il jetta vn grand soupir, *Helas (dit-il) est il possible que ce grand mal soit sans remede, c'est tout vn, ie veux prescher vn iour contre cela, i'auanceray ce que ie pourray, Dieu fera le reste.* C'estoit le sujet de sa premiere Predication, si Nostre Seigneur nous l'eut conserué.

Ses Predications estoient extremement fructueuses; car il preschoit du cœur, & parloit comme vn Apostre. Il prescha le premier iour de Carefme, toute l'Eglise estoit pleine, & l'Auditoire en sortit grandement consolé. Ie sçay de personnes de condition qui à cause de leur aage mangeoient ordinairement de la viande, n'en mangerent plus

durant le Carefme, qu'ils ieusnerent entiere-
ment : Il nous donna luy mesme vn bel exem-
ple ; car ne voulant pas vser du beurre, puis
qu'il estoit en vn pais où l'usage en est defen-
du, ny manger de l'huile puis qu'elle estoit
contraire à son indisposition : Il se resolut de
ne manger de l'vn ny de l'autre : ses domesti-
ques mesmes estant arriuez à Pasques di-
soient, *Nous n'eussions iamais creu que Monsei-
gneur eut peu tenir, ny nous durant le Carefme, mais
Dieu nous a aydé.*

Pendant ce temps de Pasques il s'apliqua
tout à fait à la Mission des Galeres : ce n'estoit
pas vn desir qu'il eust conceu depuis peu, il
ne fut pas plustost Euesque qu'il jetta toutes
ses pensées à cultiuier ces pauures abandon-
nez : Et de fait, ie luy auois escrit il y a bien
deux ans de toutes ces miseres, & sur tout de
ce que les Esclaues souffroient lors qu'ils sont
malades, comme ils meurent sur le bois, dans
la pourriture & puanteur, & accueillis de
toutes les incommoditez imaginables, voire
mesme qu'ils sont priuez presque de tout se-
cours spirituel, ne pouuant receuoir le S. Sa-
crement lors qu'ils sont dans l'extremité, dans
laquelle ils n'entendent que les blasphemes
& impietez de leurs compagnons au lieu de la
voix d'un Prestre qui les ayde à bien mourir :

ainsi les Chrestiens perissent miserablement enchainez avec les Turcs, & plustost dans le desespoir que dans des dispositions pour leur salut. Ce bon Prelat fut touché des sentimens de compassion pour ces miserables sur ce recit. Mais lors que visitant les Galeres, il vit luy mesme l'estat deplorable où sont reduits lesdits Forças malades : Il fut embrasé d'un si grand zele pour acheuer l'Hospital qui auoit esté commencé à ce dessein par le R. P. de Gondy pour lors General des Galeres, qu'il me dit vn iour, *Le dessein de l'Hospital me presse : Je m'en vay vendre ma vaisselle d'argent & emprunter le reste de l'argent, pour continuer cette fabrique, & pour achepter cent matelas.*

En mesme temps, il en escriuit à Madame la Duchesse d'Aiguillon, qui luy promit neuf mille liures pour ayder à son entreprise.

Ayant recognu l'importance de la Mission des Galeres, & voyant que c'estoit la plus importante action de son Diocese, il y appliqua tout son esprit : & ayant veu que les cinq Prestres que Monsieur Vincens Supérieur de la Mission de France auoit enuoyé pour instruire & catechiser les Forças, ne pouuoient pas sortir dans le peu de temps que les Galeres deuoient demeurer dans le Port ayant receu ordre pour aller en Catalogne, il pria Mon-

fieur Autier Supérieur de la Mission de Provence de luy despartir huit Prestres pour ensemblement avec ceux de France travailler en cette occasion ; ce qui luy estant accordé, il se mit en teste de ses Soldats & n'espargnoit pas sa personne, allant avec eux deux fois le iour, visitant tantost l'une tantost l'autre : Et son principal soin estoit de conuertir les plus obstinez, & ceux qui n'auoient voulu se rendre aux persuasions des Missionnaires, luy les attaquoit. sa modestie, sa douceur & son eloquence, jointes au caractere Episcopal donnoient vne si grande vigueur à ses paroles, qu'il n'y auoit cœur qui peust tenir. Il ne reste pas six hommes sur les Galeres qui n'ayent fait leur confession generale ; quantité d'heretiques se sont conuertis, douze Turcs ont esté baptisez apres sa mort, que luy mesme auoit gaignez & fait instruire. Vn iour il me disoit qu'il desiroit bien d'auoir quelque Prestre qui entendist les langues Orientales pour conuertir les Turcs. En ce mesme temps Monseigneur l'Euesque de Vaison m'adressa le R. Pere Louier de la Croix Religieux Iacobin reformé, sçauant homme, & principalement en ces langues, ayant demeuré au Montliban, s'en allant à Rome, attendant que le passage fust prest & le vent bon, ie le

c'est la guerre qui cause ce desordre. Je ne le pense pas, & crois assurément que le Roy ne le sçait pas. On m'escrit de Paris que S^a Maie^{sté} doit venir à Lyon, si cela est, puis que personne ne parle pour ces pauvres gens, ie m'en vray porter leur plainte aux pieds du Roy. Mais vous n'avancerez rien. Je satisferay au moins en ce poinct mon zele, respondit-il, & ces pauvres miserables seront consoléz quand ils sçauront que i'ay fait mon possible pour les deliurer. Les fruictz que les Missions font dans les Galeres sont bien grands, & seroient encore davantage si cette plainte qui met l'esprit de ces pauvres gens au desespoir, ne nous empeschoit; car d'abord que nous entrons aux Galeres, avant que nous ouvrons la bouche pour leur parler de Dieu il faut escouter patiemment leurs plaintes, leur promettre de travailler à leur deliurance, & en apres ils nous escontent patiemment, & nous ramenons ces esprits sans aucune resistance.

Il ne se passoit iour que ce bon Prelat n'allast demeurer deux & trois heures dans les Galeres: que si par fois ses affaires domestiques l'appelloient à Aubagne, il n'y pouvoit demeurer deux iours entiers, & venoit des au^{li}-tost à son travail ordinaire. Entrant à la Ville, au lieu de venir reposer dans la Preuosté où il logeoit, il descendoit à la porte de la Ville, & de là s'acheminoit aux Galeres

pour trouver en exercice ses ouuriers. Il dressa des prieres particulieres pour le soir & pour le matin, qui aujourd'huy se recitent dans les Galeres : & i'exhorte tous les Peres de Famille de les faire reciter dans leur maison. Le luy ay dit par fois de mesnager sa santé, que dans les Galeres les mauuaises odeurs luy pouuoient nuire : Il se mocquoit de tout cela, & recherchoit mesme les occasions de mourir dans cet employ. Vn iour estant en Galere, on luy dit, *Monseig. il y a vn Matelot-Flaman qui s'en va mourir, il est Huguenot, Dieu la voulu toucher à la fin de ses iours : Et comme les Prestres estoient venus pour luy donner l'absolution, ses camarades sont venus qui ont dissipé nostre dessein, & ce pauvre est retombé dans son mal-heur : Si vostre Grandeur y venoit sa presence opereroit infalliblement cette conuersion.*

Il y va, & ne fut pas plustost entré que le malade tesmoigna vne ioye extraordinaire, fait sa profession de foy ; luy donne l'absolution de ses crimes & de son heresie, & meurt entre ses bras.

Retournons à la Mission des Galeres, dont il y auoit trois ans qu'il auoit projecté le dessein, & l'auoit communiqué à Madame la Duchesse d'Aiguillon auant son despart de Paris, qui l'agrea si fort qu'elle luy enuoya

(comme il est dit cy-deuant) cinq Prestres de la Mission de Monsieur Vintens, pour tra-uailer sous ses ordres à cette charitable entreprise. A t'on iamais veu des Communions si generales dans les Galeres ? quand à Pasques trois ou quatre pour Galere communioient c'estoit vne merueille : En cette rencontre il n'est demeuré que les Turks obstinez, & les Heretiques qui ne se sont pas vouldus conuertir.

Je ne vous scaurois assez bien exprimer le changement de ces pauures miserables. La Galere semble vn Cloistre ; où auparauant on entendoit renier Dieu, maintenant on n'entend que louanges : auparauant les Comités estoient tousiours avec le baston à la main & auoient peine d'estre obeys : maintenant guidez par la crainte de Dieu, ils sont si obeyssans qu'on ne les pourroit desirer dauantage. Si les Prestres de la Mission passent par fois sur le Port, ils les appellent pour leur demander des conseils de conscience. Enfin le dernier iour qu'il y entra, ce fut le Dimanche deuant l'Ascension, où il y alla dire la Messe, & Confirma en trois ou quatre Galeres plus de cinquante Forçats. Il faisoit chaud, & sua grandement sans changer : il se porta à la maison de Monsieur de Cauuet où

les Missionnaires de Prouence estoient logez, défrayez à ses despens, & disna avec eux. Il ne chagea pas de chemise, & les mauuaises humeurs se ramasserent. Je demeuray le dernier iour de sa santé iusques à dix heures du soir avec luy, où il me parla du retranchement de son train pour auoir plus de moyen de faire de bonnes œuures.

Le lendemain au matin ie fus aduertty de son mal, ie m'en vay le voir & luy demanday quelle douleur il auoit, il me dit, *Je me sens vne grande difficulté à respirer, & ie sens vne fluxion derriere l'espine du dos.* L'on appelle le Medecin contre sa volonté, quil'ayant vëu d'abord, il dit, *Cet homme est bien malade, & courra fortune qu'il ne meure de celle-cy.* Il demura ce iour là sans parler à personne. Le lendemain Monsieur le Prieur de Saint Laurens luy ayant porté vne plainte touchant les rangs qu'il falloit donner aux Confreries qui assistent à la Procession du Saint Sacrement de ceste Parroisse, il me fit appeller, & ayant parlé quelque temps ensemble, apres que ces Messieurs furent retirez il me tint ce discours, *Que l'homme est peu de chose, & ne faut qu'un peu de mal pour l'abbatre.* Je luy dis, *Monseigneur, il semble que vous perdez courage, cecy ne sera rien moyennant la grace de Dieu, nous auons besoin de*

vous, & nostre Seigneur vous conservera pour travailler encôres quelques années pour son service. Non (me dit-il) la vie la plus longue n'est pas la meilleure, & ie croy que Nostre Seigneur me feroit misericorde s'il me vouloit retirer en l'estat que ie suis, de ce monde: Je suis dans mes ferueurs, mon cœur est remply du Zele des ames, l'homme est changeant, ie pourrois relascher: Et puis quand ie mourrois, la main de Dieu & sa sainte Prouidence, regardera ce Diocese & luy donnera vn Prelat meilleur, & qui fera mieux que moy.

Je demeuré trois iours sans le voir, ie me porte dans sa chambre, ie le vis fort abbatu, & ayant perdu la plus grande partie de ses forces, il auoit peine de parler & me dit, Monsieur, ie suis resigné à la volonté de Dieu, & tiens pour certain que ie mourray de celle-cy: Je suis disposé, & crois ce que feu mon frere me dis en mourant estre veritable. Mon frere (me dit il) ne vous attristez point, vous ne tarderez pas apres moy, nous nous verrons dans peu de temps ensemble deuant Dieu.

Je quitte ce grand Homme, pour ne le voir plus que dans les derniers periodes de sa vie: ie me retire vers vn sujet qui me touchoit de plus pres, qui est d'affister mon Pere, mourant quatre iours apres. Comme mon Pere fut en agonie ie m'en vay leur dire mon affli-

ction, il me tend la main & me dit, *Monsieur, iettez vous entre les bras de la misericorde de Dieu, ie fus marry de n'auoir les forces pour l'assister en ce passage, le plustost que vous pourrez voyez le, & donnez luy de ma part ma benediction, avec l'absolution generale de tous ses pechez: c'est vn pouuoir que le Pape m'a donné en faueur des moribondes, qui porte avec soy Indulgence pleniere. L'executay d'abord ce commandement, qui rejouit extremement mon Pere. Le soir ie luy donnay les nouuelles de sa mort: il me dit d'une voix mourante, *Monsieur, c'est a steure que vous deuez prendre plus de courage, & auoir recours à ce bon Pere Iesus Christ, qui ne mourra iamais.**

Voicy doncques que ce Grand Prelat s'approche de sa mort: nous sommes aux trois derniers iours de sa vie. Le leudy au matin vingt-vniesme May, i'estois sorty des les quatre heures du matin pour assister aux funeraillies de feu mon pere: ie ne fus pas plustost arriué au logis du defunct, qu'en mesme temps i'entendi: vn carrosse qui s'arresta au deuant de nostre maison, & vn Prestre me vint trouuer de sa part, qui me dit, *Monsieur ie viens icy de la part de Monseigneur de Marseille, il est fort mal & vous veut voir, & tout ensemble le receuoir de vostre main le Viatique.*

Le sortis à l'heure mesme, & m'en retour-

nay à la Preuosté. Je vis ce Grand Homme qui
 auoit presque perdu ses forces, fort abbatu,
 qui me dit qu'il vouloit receuoir pour la der-
 niere fois de ma main le precieux Corps du
 Fils de Dieu. Le Clergé s'assembla, & tous
 avec vn flambeau à la main, nous nous portâ-
 mes dans sa chambre. Il s'estoit assis sur le
 liét, habillé de son Surpelis & son Camail
 avec l'E stole. Nous dismes le *Te Deum*, &
 luy dit le verset, *In te Domine speraui non con-*
fundar in aeternum, avec vne deuotion singu-
 liere, puis il Communia : Tous ses domesti-
 ques fondoient en larmes, & il n'y en auoit
 aucun qui ne regretast la perte que nous al-
 lions faire : Nous rapportasmes le Sainct Sa-
 crement, accompagné d'un grand nombre
 d'honnestes gens, qui satisfirent à leur deu-
 otion, & virent Communier nostre bon Prelat
 avec grand sentiment : Je voulus apres me
 retirer, mais m'ayant fait prier de m'arrester,
 ie m'en allay voir à quoy ie pouuois luy estre
 vtile : Il me dit, *Monsieur, il est raisonnable*
auant que de partir de ce monde de donner ordre au
peu de biens temporels que ie possède : J'ay déclaré au
Petit Pere toutes mes intentions : Je ne voudrois
point faire de testament ; car ayant payé mes debtes,
i'ay supputé qui ne me restera rien. Je luy dis qu'il
 estoit tousiours expedient de faire testament,

& nommer vn heritier qui aura soin des funeraillles, & faire que les domestiques soient congediez & payez. *Hé bien ie le veux* (me dit-il) *puisque vous le iugez necessaire, & ie nomme le College des Peres de l'Oratoire.* Le luy demanday s'il vouloit faire quelques legs pieux. *Ie le voudrois pouuoir faire,* me dit-il, *mais il faut payer ce qui est de iustice, & ie ne puis donner ce qui appartient à autrui.* Nous dressâmes le testament & il le signa; & fit mesme augmenter quelques gratifications qu'il auoit fait à ses domestiques.

Ce grand Esprit fut dans vne parfaite retenue tout le temps de sa vie : iamais il n'a chancelé, mais tousiours avec vn grand raisonnement. Cela estant fait, il dit à son homme de chambre, *Donnez libre entrée à tous ceux qui me voudront voir : mais sur tout qu'ils facent la visite courte; car n'ayant plus guerre de temps à demeurer en ce monde ie me veux reconfillier à Dieu.*

Sur le tard on luy demanda s'il vouloit recevoir l'Extreme-Onction; *Tres-volontiers,* respondit-il, *c'est vn Sacrement auquel i'ay tousiours eu confiance, & qu'il ne faut pas attendre de l'administrer en l'extremité, parce que celuy qui le reçoit est incapable d'auoir les dispositions necessaires pour en ressentir les effets.* Monsieur Pachier

Theo-

Theologal & Chanoine de son Eglise la luy administra : il respondit à tout luy mesme, & faisoit des reflections admirables sur toutes ces ceremonies.

Messieurs les Consuls, qui prenant vn grand soin à sçauoir l'estat de la santé de mondit Seigneur, ayant appris qu'il s'en alloit mourant, y vindrent avec leurs marques Consulaires, accompagnez de quatre vingts personnes des plus qualifiées de la Ville, entrét dans sa chambre : il leur parla & tesmoigna qu'ils l'obligeoient grandement du soin qu'ils auoient pris, & qu'il prieroit apres sa mort Nostre Seigneur pour la conseruation de la Ville de Marseille, & leur donna sa benediction.

Après, le R. Pere Gerad Superieur de l'Oratoire, que nostre bon Prelat auoit nommé son Grand Vicaire pendant sa maladie, il luy demanda sa benediction, il la luy donna solennellement, & luy dit, *Mon Pere ie la donne en vostre personne à tout mon Diocese.* Quantité de personnes deuotes le vindrent voir, & à tous leur donnoit sa benediction. Comme cela le distraisoit vn peu de la grande application qu'il auoit en Dieu : Pour se remettre il faisoit entrer Hilarin son homme de chambre, qui luy lit durant trois iours la Pas-

sion de Nostre Seigneur selon saint Luc. Il ne luy prononçoit que cinq ou six lignes, apres lesquelles il portoit son cœur à Dieu, & tiroit pour lors des mouuemens d'amour, d'humilité, du mespris du monde, de la vanité du siecle, & du neant de nostre nature.

Sa chambre estoit dressée en forme de Chapelle, & comme aux autres malades on n'y void que phioles où il y a des remedes corporels; au contraire, dans la sienne il n'y en auoit que des spirituels: Vn Crucifix avec deux chandeliers & deux cierges, qui ont brulé durant trois iours, & vn tableau de la Sœur Magdeleine Carmelite, decédée depuis quelque temps à Paris en opinion de sainteté, qui fit comme luy des miracles le mesme iour de sa mort: Son liét estoit tout ouuert, & dans la pente il y auoit vn petit Crucifix qu'on ne le pouuoit pas apercevoir. Ce bon Prelat auoit tousiours les yeux fichez à cet Oratoire, & disoit de temps en temps, *Mon Dieu que ie meurs doucement, puis que ie ne ressens presque point de douleur.*

Alors les Prestres de la Mission que Madame la Duchesse d'Aiguillon entretenoit charitablement pour les Galeres, vindrent recevoir sa benediction, & il leur dit, *Je vous prie,*

mes peres, continuer vos charitez envers ces pauvres Esclaves. Dieu m'a donné depuis long temps des pensées pour eux, & me les a redoublées le iour de mon Sacre : Et voyant qu'il n'y avoit rien de plus necessaire dans mon Diocese, j'ay voulu commencer par eux : Je vous supplie d'y continuer autant qu'il vous sera possible.

Je ne lerray pas à vous dire les tendresses qu'il avoit pour Monsieur le Chevalier de la Coste, qui ne l'a pas laissé depuis le iour qu'il entra dans son Diocese : & comme ce Gentilhomme a ses occupations à travailler pour la gloire de Dieu, ce saint Prelat communiquoit fort particulièrement avec luy : Il prenoit ses avis & suiyoit ses conseils. Et comme ledit Sieur de la Coste le vit en cet estat, qu'il n'avoit plus qu'à rendre l'esprit, il eut le cœur si serré qu'il ne luy pût parler : Et Monseigneur luy rendit la main, & luy dit, Monsieur je vous prie de continuer les œuvres de charité, & en particulier je vous recommande l'Hospital des pauvres Forçats, ayez soin de cette œuvre, ne perdez pas courage, Dieu qui l'a commencée l'achevera. Il luy demanda en suite s'il y avoit plus de Turcs à baptiser, & si on faisoit la Mission sur la Galere Montreale, qui estoit celle qui restoit encores à catechiser : il luy dit que tout cela alloit en bon ordre. Il luy deman-

da sa benediction, & ce bon Prelat respondit, *Il est bien iuste, & ie vous la donne absolument : Puis leuant les mains & les yeux au Ciel, il dit, Ie prie Dieu Nostre Seigneur Iesus - Christ (qui ma fait dire par son Eglise le iour de mon Sacre, que tout ce que ie beniray en terre, seroit beny au Ciel) qu'il vous benisse, vous confirme en sa grace, & accomplisse les desseins qu'il a sur vous : & puis faisant le signe de la Croix sur luy par trois fois, en disant, Sit nomen Domini. Et apres il dit, Benedicat te Deus Pater, Filius & Spiritus sancti. Amen. Apres auoir acheué ces paroles, il luy dit encore, A dieu Monsieur, priez Dieu pour moy.*

Apres, arriua Monsieur Bons son Iuge au Lieu de Cassis, qui luy demanda sa benediction, il la luy donna, & luy dit, *Ie vous recommande la Iustice, vostre famille & la crainte de Dieu. Le Sieur de Sainte Colombe qui a la conduite du Refuge, voulut auoir sa benediction, & il la luy donna aussi, & l'exhorta de perseuerer dans la pratique des bonnes œuures, luy disant, Souuenex vous Monsieur, que les honneurs & vanitez du monde damnent les ames, & qu'il n'y a que les bonnes œuures qui les sauuent, faites les & dites le aux autres.*

Vendredy vingt-deuxiesme May sur le tard, & apres que le Maistre de Musique avec

les Enfans de Chœur eurent chanté en Musique à la porte de sa chambre le *Veni Creator Spiritus*, l'ayant fait ainsi practiquer trois iours deuant sa mort, pendant lequel temps il s'appliquoit parfaitement à Dieu. L'entray dans sa chambre avec quelques vns de mes parens, & m'estant mis à genoux ie luy demanday sa benedictiō; apres il me dit, *Monseigneur ie voudrois bien vous pouuoir parler mais ie ne puis*. Esleuant ses yeux au Ciel, il me dit, *Je prie le bon Dieu qu'il vous sanctifie* : Et puis prenant haleine quelque espace de temps, il retourna dire, *Je prie Nostre Seigneur, qu'il verse abondamment sur vous & sur toute la Ville de Marseille, ses graces & ses benedictions*. Apres vne autre grande espace de temps il me donna solennellement sa benediction.

Après que ie fus fortý de sa chambre, il appella tous ces domestiques, qui luy furent conduits par le R. Pere Petit son Confesseur ordinaire, estant tous à genoux, le Pere luy dit, *Monseigneur voycy tous vos seruiteurs qui vous prient de deux choses, la premiere, ils vous demandent pardon de ce qu'ils ne vous ont pas seruy avec les respects qu'ils estoient obligez; la seconde est, qu'il vous plaise leur donner vostre benediction, à quoy il repartit, Je n'ay en la pensèe que personne me d'eût aucun seruice, si vous me l'auez*

46 *Tableau de la vie & mort*

rendu, vous l'avez deu faire en consideration de la dignité qu'il a pleu à Dieu me donner; ainsi si vous avez manqué, c'est à luy à vous pardonner, comme aussi de vous recompenser, & à moy de vous de-mander pardon des manquemens que ie puis auoir fait à vostre regard, ce que ie fais de tout mon cœur. Ses domestiques estoient desia grandement desolez de la perte d'un si bon Maistre: Mais quand ils entendirent ces paroles plaines d'humilité, cela leur fit fondre le cœur en larmes.

Ce bon Prelat auoit esté grandement deuot à Sainct Augustin; & de fait, m'entretenant vn iour avec luy des differents qui estoient entre les deux Conuents des Augustines, & encores de la commission qu'il auoit receu du Conseil, pour voir l'estat du Conuent des Augustins, il me dit, Helas! i'ayme tant Sainct Augustin, & cependant ses fils & ses filles me donnent vn grand travail.

Comme ceux qui estoient aupres de luy sçauoient les deuotes inclinations, luy demandoient s'il prendroit plaisir qu'on luy l'eut les sept Psalmes penitentiaux, que Sainct Augustin estant en l'article de la mort se les estoit fait lire, Tres-volontiers (respondit il) mais Sainct Augustin auoit d'autres sentimens de Dieu que nous n'auons pas. Le Pere Pitieu Prestre

del'Oratoire qui l'assistoit, luy dit, Monseigneur, demandez dōcques à Sainct Augustin qu'il vous obtienne part à l'amour, avec lequel sa Mere Saincte Monique mourut, puis que apres auoir ouy l'exhortation de son Tres-cher Fils, luy repartit elle, *Fili mi volemus in cœlum*. Luy pareillement repetoit souuent, *Volemus in cœlum*. Et prioit ledit Sainct de luy obtenir part au degré d'amour dans lequel il estoit mort.

Ce bon Pere luy dit, Puis que vous estes dans le sentiment de Sainct Augustin & de sa chere Mere, & que vous voulez voler dans le Ciel, prenez doncques les aïles avec lesquelles il faut prendre vostre essor, qui sont les Actes de Foy, d'Esperance & de Charité, que tous Chrestiens doiuent former en extremité de leur vie & à l'heure de la mort. Ouy, respondit il, i'en suis content, commençons. Il forma l'Acte de Foy en cette maniere.

Je croy en Dieu le Pere, le Fils, & le Sainct Esprit, trois Personnes distinctes en vnitè d'essence, & à tout ce que croit l'Eglise Catholique, sans reserue ny difference aucune. S'estant osté le bonnet, tenant le Crucifix en main, le baisant souuent, il dit par plusieurs fois, *Credo Domine, credo sed adiuua incredulitatem meam*. Je le croy Seigneur, ie le croy : mais si ma foy n'est assez viue, releuez la, aydez la par vostre misericorde.

43 *Tableau de la vie & mort*

Il passa apres à l'Aëte d'Esperance, & le forma en ces termes.

Mon Dieu ie suis criminel & digne de mort : mais mon esperance est toute en la Mort de Nostre Seigneur Iesus-Christ vostre Fils, & au Sang qu'il a espanché pour moy.

Puis il passa à l'Aëte d'amour, & dit,

Mon Dieu, mon Iesus, ie renonce à tout autre amour & à moy mesme pour me lier à vous, non pour le regard de mes intersts, mais parce que vous estes digne de tout amour, & parce que vous le voulez. Diligam te Domine fortitudo mea & Dominus firmamentum meum, & refugium, & liberator meus. Seigneur qui estes ma force dans ce combat : Seigneur qui estes mon assurance, ie me rends à vous, puis que vous estes mon azile.

Comme l'vnion de l'ame avec le corps est fort grande, la separation n'en peut arriuer sans vn grand effort, & la Nature employe toutes ses forces pour éuiter tant qu'elle peut la mort, & ne se rend pas accablée de la douleur qu'apres des grands combats, desquels nostre bon Prelat comme le reste des Hommes, n'a pas esté exempt : c'est pourquoy il estoit fort alteré, & demandoit de temps en temps des fraises, qu'il prenoit avec du vin : Ce fruidt par sa fraischeur rabattant l'ardeur de la sievre, il disoit, *Toute la consolation que ie trouue*

trouue en mon mal, c'est en prenant ce fruit. Mais comme ce grand Esprit estoit en Dieu, & en la contemplation des souffrances de Iesus-Christ mourant sur la Croix, auquel il voulut se conformer, craignant que le plaisir qu'il pouuoit receuoir en prenant ce fruit ne fût desagreable à Dieu, il se tourna vers son Confesseur, & luy dit, *Mon Pere, offence ie point Nostre Seigneur en mangeant de ce fruit? Non* respondit le Pere.

Nostre Saint Pere le Pape luy auoit fait cette grace de luy donner l'autorité de pouuoir conceder en faueur moribonde Indulgence Pleniére en leur donnant sa benediction: son Confesseur luy dit, Monseigneur, ne voulez vous pas que nous vous appliquions le thresor de l'Eglise, que nostre Saint Pere vous a donné pour tous ceux de vostre Diocese? Ouy, repartit il, *i'en suis bien content, & le demande avec ferueur, non tant pour estre deliuré des peines du Purgatoire que i'ay meritées, mais pour rendre honneur à l'anthorité que Iesus-Christ a mis dans son Eglise.*

On luy presenta vne petite boëtte, dans laquelle il y auoit vne Image representant le mystere de l'Incarnation: Il la consideroit attentiuement, & puis la baisoit de temps en temps, & formoit des actes d'amour, d'ado-

ration, & de recognoissance à l'humanité sainte de Iesus-Christ. Apres quoy, le Pere qui l'assistoit à former ces actes s'arresta vn peu de peur de luy estre importun ; luy au contraire, *Courage (dit-il) poursuivons : Et à l'ame Tres sainte de Iesus-Christ ne dirons nous rien ?* Il prit la parole, & avec vn grand zele adora l'Ame de Iesus-Christ agonizante dans le Iardin des Oliues, & priant le Pere Eternel pour le salut de tous les hommes.

Le Pere qui l'assistoit, voyant que de moment en moment ses forces s'abattoient & qu'il estoit fort proche de la mort, luy mit le Crucifix à la main lequel il baïsa, & fit plusieurs Oraisons jaculatoires, tantost à la Sainte Trinité, tantost aux Personnes en particulier, à Iesus, à la Vierge, à son Ange Gardien, à Saint Jean-Baptiste son saint Patron, & à tous les Saints de la Famille de Iesus. Le Pere luy dit, Monseigneur, pendant vostre vie vous pouuez auoir par fois deshonoré la vie de Iesus-Christ : Ne voulez vous pas au moins mourir d'une mort qui rende hommage à la sienne ? *Je le veux (respondit il) ie suis tout prest.*

Ce bon Pere le voyant si bien disposé, luy dit, Pour rendre honneur à la mort de Iesus-Christ il faut entrer dans les dispositions de

Iesus mourant. Il tourna ses pensées & ses paroles sur Iesus en Croix, & dit, *O mon Iesus, faites moy ressentir l'effet de la priere que vous auez faite en faueur de vos ennemis : l'ay esté le plus grand de tous : Je vous ay humilié tout le temps de ma vie, & particulierement à l'Autel, ne respondant pas à la grace que vous m'auiez faite de m'appeller à ce ministère : ie ne sçauois ce que ie faisois. Pater ignosce, Pater ignosce.*

Puis il parla à la Vierge, & il dit, *Vous estes ma Mere, particulierement par donation : Iesus vous a donnée à moy en cette qualité, & son Bien-aymé Disciple vous a acceptée en mon nom : Je ratifie en ce moment cette acceptation. Sub tuum presidium confugio. Regardez moy comme vostre Fils, maintenant & en ce moment duquel depend mon Eternité.*

Après il fit amende honorable en qualité de Larron, à Dieu, à la sainte Vierge, & à son Ange Gardien, & pria Iesus Christ par les merites de son Sang, de prononcer en sa faueur ces agreables paroles, *Hodie mecum eris in Paradiso. Il est vray (disoit il) ie merite la mort, mais vous estes le Fils de Dieu viuant, sur quoy comme sur l'Agneau de Dieu sans macule, la misericorde de vostre Pere a transferé ma mort. Dittes doncques par vostre bonté en ma faueur, Hodie mecum eris in Paradiso.*

Puis baissant derechef le Crucifix , il dit, *Sitio, Donnez moy au moins , mon Iesus , part à l'amour en laquelle vous m'avez aimé : Que ie meure en vostre amour & pour vostre amour.*

Il estoit desia mort en ses parties , & n'auoit plus que le cœur qui est le dernier mourant , qui receuoit les attaques de la mort : Il souffroit , & dans ses angoisses , il disoit , *Seigneur ne m'abandonnez pas : Je souffre , ie le veux puis qu'il vous plait , donnez moy force pour souffrir.* l'entens son cœur defaillir , & il dit , *Mon Dieu vous avez esté consummé en Croix pour moy , donnez moy la grace d'estre consummé pour vous.*

C'est maintenant que ce Phoenix doit mourir sur ce bucher qui luy est préparé , de tant de vertus que depuis long temps il a pratiquées : c'est à cette heure que ce Cygne doit chanter le plus melodieusement , puis que ce sont ses dernieres paroles , escoutons le parler.

Seigneur , ie vous rends honneur & homage de ma vie , & comme vous avez remis vostre ame entre les mains de vostre Pere , ie rends la mienne entre vos bras. Et vous mon bon Ange Gardien , ie vous la remets & vous supplie de la presenter à mon Iesus , afin qu'il daigne la recevoir. Et puis relevant sa voix d'un ton plus haut , se mit à

dire, C'en est fait, c'est à ce coup, il y va tout de bon. *Veni Domine Iesu, veni Domine Iesu, moriatur anima mea morte iustorum.* Et apres il demeure encore deux heures sans parler, & perdant tous ses sentimens les vns apres les autres : & sur les six heures du matin, veille de la Pentecoste, rendit son ame à Dieu, avec tant de tranquillité, qu'on demeura l'espace de quelque temps pour cognoistre s'il estoit mort ou vivant.

Voila la fin de ce grand Euesque, qui a esté continuellement attaché à Dieu, ne s'estant proposé autre but en son Episcopat qu'à procurer la gloire de Dieu & le salut des ames : Toutes ses pensees estoient à faire des Missions dans son Diocèse, prodigât sa vie & ses commoditez pour ce sujet. Exemple admirable à tous Nosseigneurs les Prelats, puis que suiuant ce qui est couché dans l'Eseriture aux Actes des Apostres cap. 20. *Attendite vobis & vniuerso gregi in quo vos Spiritus sanctus posuit Episcopos regere Ecclesiam Dei.* Aussi l'amour qu'il portoit à son Troupeau estoit si grand, qu'il estoit plus à nous qu'à luy mesme.

Enfin ç'a esté vn Hōme qui est allé en Paradis, comme l'on dit, en carrosse, il n'a fait aucunes austeritez extraordinaires ; mais

il a practiqué les solides vertus , il eut vn cœur formidable & attaché à Dieu , vn amour admirable pour son prochain , vne chasteté Angelique , vne modestie rare , vne douceur rauissante , vne humilité sans pareille , vne liberalité enuers les pauvres tres-grande , & sa patience dans sa maladie & dans ses douleurs consoloit & rejouyssoit tous ceux qui le seruoient.

Voila cher Lecteur , les 'grandes actions que ce digne Prelat a fait dans quatre mois & six iours en son Diocese. Il me disoit ordinairement qu'il luy falloit trois ans de vie pour mettre en estat tous les desseins qu'il auoit & que Dieu luy auoit inspirez pour nostre consolation.



DESSEINS QUE FEV

Monseigneur Jean Baptiste Gault Euesque de Marseille auoit pour l'instruction de tout son Diocese.

DEz aussi-tost que le Sieur Euesque eut consenty à la nomination qu'on auoit fait de sa personne à l'Euesché de Mar-

seille , Nostre Seigneur luy fit cognoistre que le vray but & fin de l'Episcopat comprenoit principalement deux poincts.

Le premier , de trauailler de tout son pouuoir , à establir dans tout son Diocese, la crainte & l'honneur de Dieu, & faire qu'il fust adoré, aymé & cogneu de tous.

Le second , de s'employer puissamment au salut des ames, chercher tous les moyens que ceux qui sont dans le peché se conuertissent à Dieu , & ceux qui probablement viennent hors du peché, & sont dans la grace se perfectionnent dans la veritable pieté. Et c'est conformement à ce que l'Escripture nous apprend, lors qu'elle parle de la venue du Fils de Dieu en terre , lequel il a dit souvent qu'il estoit venu pour y establir la gloire de son Pere qui l'auoit enuoyé : Et outre ce qu'il estoit venu pour communiquer la vie aux siens , destruire l'Empire du Diable & de la Mort. *Ego veni vt vitam habeant.* Et encore pour rendre plus parfaits ceux qui ont receu la vie , *Et vt abundantius habeant.*

Or comme le Fils de Dieu trauailloit continuellement à establir la gloire de son Pere , duquel il estoit enuoyé. Les Apostres fidelles tesmoins de la vie & de la mort de Iesus-Christ, ont esté enuoyez par luy pour

courre toute la terre habitable, & respandu par tout la cognoissance des mysteres de Iesus-Christ, & faire adorer, cognoistre, & aimer, comme il est porté, sur ce que le mesme Fils de Dieu dit, *Sicut misit me & ego mitto vos, & eritis mihi testes vsque ad ultimum terræ.* De mesme, les Euesques successeurs des Apostres doiuent dans l'estendue de leur Diocese, y parfaitement establir la cognoissance de Dieu & de ses mysteres: Et premiere-ment commander par soy mesme, & demander à Dieu la grace de cognoistre sa volonté, pour bien regir les ames: & pour cet effet il doit prendre vn iour de l'annee auquel on fera des prieres publiques pour luy, & principalement dans les maisons des Filles Religieuses sujetes à son obeissance, raschera que tous les mois elles facent vne communion generale pour luy: Et s'il se peut tous les iours y auoir vne Fille ou deux qui communient à Son intention, & reciteront l'Oraison suiuiante, que ce bon Prelat auoit composée luy-mesme, & qui n'a pas esté publiée, sa mort ayant rompu ses des-seins, en voicy la teneur.

ORAIISON

O R A I S O N.

IE vous adore, ô mon Seigneur Iesus-Christ, qui estes le Fils du Pere Eternel, & avec luy principe du S. Esprit, qui par vne misericorde infinie auez voulu estre Homme pour le salut du Genre humain, & qui pour establir la gloire de vostre Pere en la terre, & conduire les ames au Ciel, auez instrifié vostre Eglise, que vous regardez comme vostre Espouse, qui pour la direction & regime de ceste Eglise, luy donnez des Euesques & Pasteurs qui en ayent le soin. Je vous offre mes tres-humbles prieres pour tous les Euesques & Pasteurs d'icelle: Vous suppliant instamment de leur despartir les graces necessaires pour dignement s'acquitter de ceste grande Charge, & principalement ie vous supplie pour celuy du Diocese de Marseille. Regardez-le, Seigneur, de vostre œil de misericorde, rendez le selon vostre cœur, faites qu'il vous considere tousiours cōme le modèle de sa vie: Vous qui estes vray Euesque & Pasteur de nos ames, dressez tellement ses intentions qu'il n'aye autre but que d'establir vostre regne dans ce Diocese, & de conduire au Ciel les ames que vous auez racheprees par vostre sang, & dont vous luy auez donné la charge: Et d'autant que nous viuons icy parmi les tenebres, Vous mon Seigneur qui estes la vraye lumiere & sagesse infi-

H

58 *Tableau de la vie & mort*

nie, esclairez son esprit, & donnez luy les cognoissances propres pour sa charge. Et parce que veu nostre foiblesse, ce n'est pas assez de cognoistre le bien: Je vous demande ô mon Seigneur & mon Dieu, qui estes le principe du diuin amour, que vous eschauffiés tellement sa volonté, qu'elle soit remplie de vostre charité, afin qu'il vous regarde comme l'objet principal de ses affections, & en suite que pour l'amour de vous, qu'il ayme & cherisse d'une charité veritable tous ceux du Diocese, & que par sa conduite & par ses exemples, il fasse enuers eux tout le temps de sa vie l'office de vray Perc & de vray Pasteur. Ainsi soit il.

Voila l'Oraison que luy mesme auoit dressée afin que chaque Maison Religieuse la recitast à son intention. En suite de celle là il auoit desir d'en dresser vne autre, en laquelle il deuoit demander à Dieu la grace necessaire pour bien conduire son Diocese: Il la vouloit former sur celle que Salomon fit, demandant à Dieu la sagesse pour bien regir son Estat, representant à Iesus-Christ que les ames, qui par sa diuine prouidence, sont sousmises à sa conduite, elles luy appartiennent ayant esté rachetées de son precieux Sang, s'adressant à la Vierge, pour le pouuoir qu'elle a sur son Fils; aux Anges Gardiens de tous ceux du Diocese, aux Saints tutelaires, comme à S.

Lazare, S. Victor, S. Louys, Sainte Magdeleine, & Sainte Marthe.

Il desiroit passionnement porter les peres & meres à prendre vn iour de l'année pour faire la sainte Communion ensemble avec leurs enfans, & à l'imitation de la Tres sainte Vierge qui offroit son Fils au Temple, offrir pareillement leurs enfans à Dieu. Et il iugeoit le iour de la Purification le plus propre pour cela. Et pour les faciliter à faire cette offrande avec sentiment interieur, il voulut dresser vne Oraison contenant ceste obligation, de laquelle chacun s'en fust seruy.

Il vouloit aussi porter chacun en particulier à Iesus-Christ, en honneur de ce que luy mesme s'est offert à son Pere, & qu'on s'offrist pareillement à la Sainte Vierge, afin qu'elle daignast de nous offrir à son Fils bien-aymé, en recognoissance de ce qu'elle auoit offert son Fils au Pere Eternel. Et cette oblation qu'il luy vouloit dresser, deuoit contenir vne acceptation volontaire de la Croix qui plaist à sa diuine bonté nous enuoyer.

Bref, pour vous deduire toutes les tendresses de ce bon Pere, pour l'eduction spirituelle de ses enfans, & pour leur instruction, il faudroit faire vn Liure qui surpasseroit infiniment ce que ie me suis proposé, qui n'est que de

vous faire vn recit veritable de sa vie & de sa mort, autant precieuse au conspect de Dieu, qu'instructiue pour le salut des hommes.

Voila cher Lecteur, tout ce que i'ay peu recueillir de ce Grand seruiteur de Dieu, par la conuersation que i'ay eue fort particuliere avec luy, & par ses escrits. Je voudrois bien vous pouuoir communiquer ses vertus, comme ie vous en donne la connoissance: Mais c'est vn ouurage du Sainct Esprit, qui le despart quand il luy plaist & à qui bon luy semble: Neantmoins il faut dire que iamais Indulgence Pleniere ny Iubile vniuersel, n'a tant fait faire de confessions ny tant de conuersions que la mort de ce Bienheureux. Il n'y a personne presque qui n'aye esté touché interieurement, & qui n'ay rendu de grands honneurs à ce Venerable Corps; car il ne fut pas plustost mort & mis dans la biere qu'on l'exposa au public.

Il estoit beau à merueilles: Le Chapitre y fut pour le prendre dans sa chambre; & le porter dans vne Chappelle de l'Eglise Maior pour le laisser vingt-quatre heures exposé; il n'y fut pas plustost que le monde y acourt; & de leurs mouuemens faisoient toucher leurs Chapelets: cela dura depuis onze heures du matin, veille de la Pentecoste, iusques sur les deux heures a-

pres midy, que le bruit commun dans l'Eglise & par toute la Ville que ce Grand Homme faisoit des Miracles.

Après Vespres le Chapitre s'assembla, & ayant resolu de faire les funerailles le lendemain, nous estions encore tous ensemble que l'Eglise se trouua toute pleine de monde.

Messieurs les Consuls estans aduertis de ce grand concours ils y vindrent, & ayant veu la deuotion du peuple, nous requirent de ne le mettre pas en terre durant les trois Festes, que pendant ce temps là le peuple pourroit satisfaire à sa deuotion & à sa curiosité. Ce qu'estant accordé, on donna ordre d'embau-mer ce Corps la nuit suiuite; ce qu'estant fait en presence desdits Sieurs Consuls.

Le lendemain iour de la Pentecoste, & les deux festes suiuites nous ne peûmes pas faire nostre Office avec la solemnité requise: La Nef & tout le Chœur estoit plein de peuple: Le bruit s'espandit si fort aux lieux circonuoi-
sins que plusieurs vindrent se ietter dans nostre Ville: Les grandes merueilles qui s'y faisoient, appelloit les estrangers, & rendoient ceux de la Ville opiniastrés à ne bouger d'au-
pres de ce Corps, en telle sorte que l'Eglise ne se pût fermer durant trois iours.

Enfin la derniere feste ayant eu vne quai-

se de plomb, nous mîmes dedans ces saintes Reliques, lesquelles ont esté visitées des principaux de la Prouince : Et afin de satisfaire aux Ordres de l'Eglise, quinze iours apres nous le portâmes par la Ville en procession comme les autres corps ont accoustumé d'être portez.

Les funerailles ont esté les plus magnifiques qu'on aye iamais veu: Tous les Penitens y assisterent, faisant vn nombre de trois à quatre mille personnes, ils marchoiẽt sans aucune confusion, puis le Clergé. Le Chapitre de l'Eglise Cathedrale portoit des Torches pour honorer ce Corps, les Beneficiez en portoient aussi avec les armes du defunct, puis venoit vingt-quatre Hommes des plus qualifiez de la Ville qui en portoient aussi, tous le chapeau au poing : Apres venoit le Corps dans sa biere de plomb, couuert d'un drap de velours noir, porté par dix-huict Prestres: Aux quatre coins estoient les quatre Capitaines des quartiers de la ville, assistez de trente ou quarante Gentils-hommes tous habillez de noir, teste descouverte, l'espee au costé, & tantost les vns tantost les autres, se mettoient soubz la Biere pour ayder nos Prestres à porter ce sacré Depost. Toute la ville ne retentissoit qu'en benedictions. Des fene-

Itres de toutes les maisons on ne iettoit que Lys, que Roses, & que Oeillets. Apres sui-uoient Messieurs les Magistrats, suivis de quinze à seize milles personnes. Le lendemain nous fîmes son service & son oraison funebre, & le reposâmes sur le Tombeau ordinaire des Euesques, visible à tous, pour satisfaire à tous ceux qui ont recours à ses intercessions.

Je croy mon cher Lecteur, que tu attends encore le recit d'une infinité de Miracles qui se sont faits tant à son Sepulchre que dans sa premiere quaiſſe: il n'est pas raisonnable que nous les mettions sur la Presse, puisque on procede à present à l'information, quand on l'aura (s'il plaist à Dieu) Beatifié, on en pourra faire vn grand volume, il suffit que ie te die en deux mots, *Surdi audiunt*, *Cæci vident*, *Claudi ambulant*, *Leprosi mundantur*. Car en mon particulier, ayant eu de luy par codicile, pour tesmoignage de son amour, son Anneau Episcopal, quantité de personnes l'ayant baïsé, vne femme entre autres a receu la veuë en vn oeil qu'elle auoit perdu depuis quatre années, en presence d'un des fameux Medecins de cette Ville, du Chirurgien qui l'auoit traitté, & de vingt-cinq personnes qui estoient dans ma Sale. Vn boiteux du


lieu de Pelissanne a marché droict apres l'auoir baisé. Vn Forçat de la Galere Royale, paralytique depuis deux ans, en presence de deux cens cinquante personnes, sauta sur le Courrier de ladite Galere, & cria à haute voix, *Je suis guery*. Vne Dame de la Ville d'Aix paralytique depuis six mois fut à l'Instant guerrie, par l'atouchement de son cœur & de son anneau, elle marcha par la salle à l'estonnement de toute la compagnie qui y estoit.

Enfin Seigneur, soyez encore plus exalté en ce Sainct, par les merueilles spirituelles qu'il a operées, puis que *Surdi audiunt*, ceux qui faisoient la sourde oreille à vos inspirations, ils escoutent à present vostre voix. *Claudi ambulans* : Ceux qui marchotent à pas de Tortuë aux bonnes œuvres, courent comme des cerfs alterez à vous Fontaine de grace & de misericorde. *Cæci vident*, Ceux qui estoient aueuglez des vanitez du siecle, ne veulent plus regarder que vous, Splendeur du Pere, Lumiere eternelle, Roy de gloiré, Soleil de Iustice, Dieu de Paix, Autheur de la vie, Exemple de toutes vertus, Pere des pauvres, Thresor des fides, Sageste eternelle, Bonté infinie, Ioye des Anges, Maistre des Apostres, Docteur des Docteurs, Force des

Mar-

Martyrs, Lumiere des Cōfesseurs, Pureté des Vierges, & recompense de tous les Saints. *Leprosi mundantur.* C'est à vous que ceux qui sont couverts de lepre & enormes pechez courent pour estre gueris. Vraye Piscine, c'est à vous qu'ils viennent pour estre lauez, comme iadis Naaman au Fleuve Iordain: Riviere admirable qui decoulez par cinq sources en Fleuve de sang: C'est à vous que viennent les paralytiques qui ont trente-huict ameres infirmittez, comme à la Piscine de Hierusalem, ceux qui ont leur conscience chargée des crimes inueterez. Bref, il n'y a personne dans la Ville de Marseille, qui n'aye receu ou guerison spirituelle ou corporelle. Gloire en soit eternelle au Pere, au Fils, & au Saint Esprit.

F I N.



A
LA GLOIRE DE DIEU,
ET A L'HONNEUR DE MESSIRE
IEAN-BAPTISTE GAVLT,
Euesque de Marseille.



IE ne sçay si mon ame a de se reioiuyr,
Oud'espandre des larmes.
Si ie dois ô Marseil, icy me conioiuyr,
Ou faire des vacarmes.

L'Obiet miraculeux que tu voy, Marseillois,
Qui brauant la Nature en interrompt les loix,
Et qui par les muets te produit des Oracles,
Ie doubte si c'est point à ta confusion.
Et si l'on peut pas dire en ceste occasion,
Que le seul infidelle a besoin de Miracles.



Non ie croyay plus tost que la bonté de Dieu
Sur ta bonté se fonde,
Laquelle l'a forcé de prefer ton lieu,
A tout autre du monde.

Puisque la Charité l'a choisi pour seiour,
Que la deuotion, que le Zele & l'amour
Dans son aymable enceinte y sont comme chez elles
Je veux croire que Dieu qui lit dedans les cœurs,
L'a choisi pour Piscine à toutes ces langueurs,
Et qu'on doit l'appeller la Cité des fidelles.



Conserue ce Tresor, reuere ce Depos,
Bien-heureuse Marseille,
Garde par tes meffaits de troubler son repos,
Le Ciel te le conseille.

Ce Prelat Bien-heureux doit estre ton rempart,
Et si, comme il peut estre, vn iour de quelque part
L'effort impetueux d'un ennemy t'assailles
Tousiours fidelle à Dieu, à la Vierge & aux Saints
Tes enuieux verront confondre leurs desseins,
Car Iean-Baptiste Gault doit estre ta muraille,



Fay qu'en luy soit tousiours stable ta fermeté
Et forte ta vaillance,
Tu ne scaurois douter ny de sa sainteté
Ny de sa bien-veillance:
Tu l'as veu te cherir, t'aymer, te caresser,
Chercher tous les moyens de mieux t'intéresser
A rendre à l'Eternel ce qu'on luy doit de culte:
Et pour sa sainteté, voy tu pas tous les iours
L'Aueugle & le Boiteux, les Muets & les Sourds
Voir, aller & parler par sa puissance oculte?



Ne nous estonnons point si la cire & les fleurs
Font mesme des merueilles,
C'est que ce grand Prelat pour guerrir des douleurs
Imite les Abeilles:
Si d'une fleur à l'autre elles vont picorer,
Ce Saint qui ne chercheit qu'à tousiours decorer
De nouvelles beautés la maison de son Maistre
Prenoit tant de delice à pouuoir l'embellir,
Que ses desirs alloient incessamment cueillir
Les fleurs qu'à ce dessein Iesus Christ a fait naistre.



De là sa charité prenoit de quoy fournir
Aux desseins de sa gloire,
De là presque vn Enfer a bien pû deuenir
Plus doux qu'vn Purgatoire,
Par ainsi conuenant à diuerses humeurs,
Il rend d'vn diuers peuple & l'amour & les mœurs
Vnis plustost de cœur que non pas de langage:
Apostre de Iesus, Esprit du S. Esprit,
Il croit que son deuoir ce deuoir luy prescrit,
Et qu'vn tiltre d'Euesque à tout faire l'engage.



On dit que l'Esmerande à cette qualité
De resjouir la veue,
Mais celle de ce Sainct, de plus d'utilité
Se trouue icy pourueue,
Car cette heureux Pasteur l'ayant mise en depost
Entre les dignes mains de Monsieur le Preuost,
Le seul baiser d'icelle en tant de biens consiste,
Que l'on pourroit douter si c'est à cét Anneau
Qu'il faut rendre les vœux, ou si c'est au Tombeau,
Ou reposent les Os de l'heureux Iean-Baptiste.



*Mais ce Coffre de plomb où ce Corps S. fut mis
Qui le baise ou le touche
Sent il pas le renfort de ses membres desmis?
Et bien plus s'il s'y couche.
Sa Chaire Episcopale a des effects pareils,
Qui guerit à l'instant sans autres appareils
Le Bossu, le Boiteux, & le Paralytique:
Les miracles qu'il fait nous sont tant euidents,
Que les desaduouer c'est paroistre imprudent,
Avoir l'esprit d'athée, & pire qu'heretique.*



*Les dons interieurs partant d'ames receus,
Doiuent bien ce me semble
Pour leur preeminence, emporter le dessus
De tant d'autres ensemble.
L'Herésie abbarue au deffy de l'Enfer,
L'Esprit vindicatif qui met abas le fer,
La rencune & l'orgueil qui s'abbaisse & s'acorde
Sont-ce pas des effects qui font sans contredit
Espérer que ce Sainct ayant tant de credit
Nous peut bien impetrer la paix & la concorde?*



O Ciel qui nous voyez, qui le voyez aussi,
La requeste est civile,
Faites que ce grand S. prenne en gré le soucy
De cette sienne Ville
Nous vous en coniurons, Prelat tres-generoux,
Par vostre ardeur intime & vos soins onereux,
Et par ce Borromé vostre sacré modele :
Et vous, l'Aymé de Dieu, nostre premier Pasteur,
Faites qu'entre vous trois nous possédions cet heur
Que Marseille à iamais soit paisible & fidelle.

Par l'Academie de M. CHABAYD.



